

銅鼓書常遺稟

序

查君儉堂泣蜀之三年盡哀其己丑以前之作走使徵序
余戢影蘧廬發書而讀如見儉堂萬里之外頭白知交惟
兩人在儉堂之詩舍余孰爲元晏哉儉堂難死曰蓮坡先
生耽嗜風雅狎主齊盟海內詞人靡不向風景慕同時廣
陵馬氏遙遙相望余南北往來兩家園林必畱信宿親致
師摩壘其閒而蓮坡遂繼以昏姻之好故余弟畜儉堂亦
不余嗔也

今上龍飛廷試鴻博之士得十五人餘皆報罷然輦轂人
才於斯爲盛其時水西山莊之賓客亦視前後爲最盛刻
燭分題藏闕鬪酒蓮坡應接無倦容而儉堂年甫弱冠肩
隨秦晉才情騰踔出示一篇則已驚其夙素猶憶史館下

直苦吟無俚餽問來自尺五城南安成之食潘園之果堆
案盈几喜動家人而儉堂蠶尾細書緘詩投贈意殷摯如
其兄自丙辰至癸亥首尾八年一旦余以言事罷斥忍痛
別去常恐前死無相見之期乃隔廿餘年余猶幸存不見
蓮坡而兩見儉堂焉儉堂以戊辰歲官農部郎尋外擢單
車赴嶺表取道與余相見於西湖會余膺羔雁之聘主講
粵秀書院儉堂自慶遠來則又相見於五羊城蓋在壬申
夏五時蓮坡下世未久見儉堂且痛蓮坡也蓮坡與余談
藝最洽儉堂之詩杼軸性靈原本忠孝猶蓮坡之教也今
披其全集少作已自可傳而傳儉堂者尤在服官以後之
作重葺黃文節公祠探湘灘二水發源處浚靈渠修秦郡
監史祿遺蹟美政藉藉人口杜拾遺一代詩史未歷方州

元道州咨嗟民瘼治具無所恢張儉堂身際清時有猷
有爲不肖以虛聲竊盜一編治譜見於盈寸之詩前賢對
之有餘媿矣而乃仕優則學自視欻然歸裝載石清風動
林余不見儉堂而見儉堂之詩匪惟競爽蓮坡詩之有用
於世此其明效大驗矣儉堂具方圓可施之才今觀察川
北以六條計吏行且駸駸大用矣有方召之臣必有方召
之詩如江漢常武者豈以一官一邑之治爲足衡量吾儉
堂也耶姑就其所已編者而論之如此蜀道遠在天上繼
見無日余髮種種猶思揮魯陽之戈延景桑榆序儉堂他
日未見之詩也

乾隆庚寅日在西陸仁和姻弟杭世駿拜手

銅鼓書堂遺藁序

昔

仁廟時翰林查慎行以文學侍從嘗有瀛臺坐釣應

制之作曰

臣

本煙波一釣徒蒙

帝賞賚

內侍

每傳呼煙波釣徒查翰林以別於聲山學士

昇云而其所著敬業堂集亦遂盛行於天下故湖南巡撫儉堂先生弱冠卽蜚聲文苑舉博學鴻詞科試不利又困京兆試乃以貲爲農曹郎世咸謂文章無命豈知魁偉絕特之士天必試諸盤根錯節之交以淬其鋒而礪其鏘然後畀以重任而履危而能安視險而如夷見義而必爲見可欲而不動不似尋章摘句以科第顯於時而無所樹立者

故其發爲文章乃經世有用之文非徒學士謳吟之物先生之長君淳守桂林搜羅先生詩文爲銅鼓書堂遺藁若干卷致書於余乞校訂而爲之序余胡足以知先生之集然余之知先生者嘗自許在筆墨之外則筆墨所及又烏敢辭先生於書無所不窺其詩不名一體而大要則視煙波釣徒如冰之生水然釣徒未見諸事而託於詩先生之事則一一見諸詩而徵其學遭逢

明聖仕宦三十餘年南至南越西浮弱水蒼顏白髮據鞍揚揚諸番羅拜萬姓待哺仰之若父母尊之如神明而先生之勞其心力苦其筋骨不顧身不顧家犯大帥而不以爲忤折僚友而不以爲非遇倉

卒而不驚任非常而不變每於拈韻揮毫流露古
君子立身行義之本固未可以晚近詩人目之也
嘗試取而誦之時或驚風雨泣鬼神時或諧韶濩
咀金石想其握管摘詞句斟字酌一筆不苟下大
抵千捶百鍊而合於自然藉非浸淫百家陶鎔萬
有其孰臻此閎中肆外從心所欲者哉吾知是集
出而海內爭先覲之以爲快其與敬業遺文齊驅
竝軌無疑也先生尤工於詞深得姜史三昧今附
刻詩集後有德者必有言世之學者自此可知古
君子之行有不徒虛車之飾者然則彪炳史冊照
耀旂常而爲世楷則洵乎其枉筆墨之外也哉是
爲序

乾隆五十有七年四月既望梁溪顧光旭頓首書
於松風閣中

銅鼓書堂遺藁卷目

卷一

古今體詩七十四首

卷二

古今體詩六十五首

卷三

古今體詩七十四首

卷四

古今體詩六十四首

卷五

古今體詩六十九首

卷六

古今體詩四十二首

卷七

古今體詩六十一首

卷八

古今體詩七十首

卷九

古今體詩八十首

卷十

古今體詩八十三首

卷十一

古今體詩八十八首

卷十二

古今體詩八十首

卷十三

古今體詩七十六首

卷十四

古今體詩六十首

卷十五

古今體詩六十七首

卷十六

古今體詩七十首

卷十七

古今體詩八十九首

卷十八

古今體詩七十二首

卷十九

古今體詩七十九首

卷二十

古今體詩六十六首

卷二十一

古今體詩五十一首

卷二十二

古今體詩五十八首

卷二十三

古今體詩五十二首

卷二十四

古今體詩六十七首

卷二十五

詩餘五十六首

卷二十六

詩餘四十九首

卷二十七

詩餘四十三首

卷二十八

賦一首 辨一首 考一首 序六首 文一首

卷二十九

記十二首 日札一首 題名一首

卷三十

題跋四十八首

卷三十一

碑二首 志一首 行畧一首 哀辭一首 碣銘

一首 硯銘一首 上梁文一首

卷三十二

詞話

銅鼓書堂遺藁卷一

宛平 查禮 恂叔

甲寅

春日郊遊

野馬田閒路悠悠遠世情荒原殘碣臥古墓朽株橫農圃
非家學巖阿負隱名佇看煙景召花事競春城
落盡殘梅處無鶯拂柳條溪陰水未解徑滑雪初消飢鵲
窺芳榼疲驢怯板橋一聲清磬響隔水寺非遙
亥市囂塵散芳津煙靄中帘斜村店靜岸闊夕陽空蘭茝
安初服園塵得古風漁樵舒嘯傲誰許話窮通
登臨非有意來去更何期蟾影穿疎樹龍聲出短籬興闌
歸覺晚境僻轉忘疲欲待桑麻長還將筆硯隨

春雨二首

雨意廉纖少客過茶參經訣佐吟哦數聲鳥語來相和爲
報梨花勝雪多

胭脂狼籍杏開時燕子尋巢飛故遲窗鎖輕寒春寂寂一
簾香雨放翁詩

針魚

長河漲新流漁艇終朝集針魚一寸餘萍浪穿不溜良無
繆漚虞詎愁笮簪及人情細亦貪趁彼漪瀾急背風使罟
網鹿角斂呼吸懷刺不善防翻同腐芥拾在昔後秦朝國
師有羅什食針如食蔬觀者皆悚立何年化此魚饕餮恣
所給物微倍宜恤生意常戢戢舍之任悠然遲將一當十
是以古滄池永無數罟入

過水西莊

小築臨春水，風光宛若耶。
碧園三徑柳，紅閒一籬花。
拂座雲生牖，開門鶴到家。
機心從此息，抱甕入桑麻。

訪周月東秀才

暇日訪高士，扁舟泛綠水。
春花依岸開，眠柳因風起。
閒禽向客吟，馴犬迎人喜。
剝啄叩柴荆，應門走童子。
茶鐺咽松風，麈談嚼宮徵。
竊若空山中，嗒然忘城市。
昔聞周彥倫，俯仰隨行止。
歌嘯載簪盃，籌畫萃名理。
今君磊落懷，出處同風旨。
時或彈素琴，時或憑古几。
時或酒盈杯，時或書透紙。
玩弄秦漢章，點竄南北史。
把卷一室內，戶外常滿履。
流連蘊真趣，瀟灑絕塵滓。
幽情堅寸抱，不逐浮華徙。
余敢謂忘形相對無，彼此茆檐挂斜暎。
清興殊未已，醉歌徐返棹。
月

照波心裏

題王孝先負劒游集

醉鄉原是君家集
醒後應無細碎讎
斫地歌聲金石振
與君含笑論吳鉤

山水歌贈陳方來處士

松風不定疎簾舉
積翠森然壓院宇
誰遣夸娥移此峯
削成崖粵非斤斧
下有流泉流汨汨
寒光澹沱清毛髮
便欲移家傍淺沙
潺湲深處邀古月
展圖閃閃光華生
乃知畫法通神明
龍從應有山靈助
絳麗還如溪女行
西巖先生愛奇傑
到處探幽挾林穴
冲懷磊落胸腹寬
不貯繁華貯冰雪
興來落墨如秋雨
化學乾坤意師古
逸想凝神結構成
他人那識經營苦
槐陰轉夏炎
燭蒸贈我八尺鸞
溪綾

絺衣軒軒動涼色直教虛室凝層冰王蒙倪瓚不可見餘
子紛紛何足算先生畫手世所稀似向匡廬得真面柿紅
之錦盤雕文沈香之軸椒蘭芬爲君什襲終千古也勝支
頤對碧雲

五月晦日攬翠軒納涼

避暑無奇策開樽水竹閒香清紅藕密波靜白蘋閒蟬聚
聲如雨林深翠似山石牀斜照外敲枕聽潺潺

雨後與胡文錫小酌

小酌非緣客空庭絕點埃好風吹雨去皎月破雲來坐久
吟忘倦眠遲漏故催芭蕉清露下相對盡餘杯

題齋壁

一榻蕭然晝掩關壁將圖畫疊溪山夜來有夢歸何處只

金黃書生詩集卷一
二
在松風蘿月閒

寄懷履方仲兄

樂敘天倫醒醉同挂帆一去酒樽空音塵常在家書外夢
草還存詩卷中廿四番風花次第二千餘里雁南東秋光
應讓江淮好蟹正肥時霜葉紅

采菱歌

妾家住溪南采菱溪之北紅日映綠波照見妾顏色

舊滄州鐵獅子歌

吾聞條支之國生逸材毛如黃金尾如斗含威蓄怒肆大
聲四谷噲咤萬雷吼飛熊帖伏學醯雞猛虎倉皇類芻狗
平原曠野不代生絕域靈區閒時有麒麟而下百獸尊卓
越凡庸冠羣醜木門城邊秋日皎瑟瑟西風動衰柳忽驚

巨物扼當塗形體龐然儼岡阜高標直欲摩蒼雲平臥猶
堪橫數畝晶瑩寓目撐空睚眦達寬頤哆方口路人羣說
是獅王浴鐵爲身駭飛走爲想當年鎔鑄時鼓鞴泥鑪事
紛揉鍊精幾費昆吾金搏質還須巨靈手吁嗟創作誠神
奇磅礴陰陽事非偶一從荒煙委寂寞苔蘚潛滋積塵垢
少陵昔詠石犀行莊語詆諆蜀太守要將正道承先王不
使奇衰惑童叟我今懷古異拾遺但有摩挲無冒詬

讀南唐書

擾擾中原日東南倚柱初盤根仙李大王氣秣陵餘節儉
多遺則寬仁有令譽彭奴規畫遠拓跡盡淮徐
地逼思蠶食時平尚武功延津方得劒楚國又亾弓黃爵
窺覲密寒蟬覆蔭空數峯青峭色早晚掩屏風

願作龜茲國盈庭事晏安臣吟宮瓦曉君賦玉笙寒高髻
看新製燒槽續舊彈誰知繡餽句汴上泣金盤

一代多忠節由來愛碩儒黃花終不漲白甲漫前驅客痛
朝衣拜人稱夜宴圖翻思開國際隔水擁灰鑪

雪夜

北風吹夢醒雪片打窗響夜半耿孤燈寒逼早梅想

苦寒吟

城陰積雪凍不消林霜慘刻翔獐飈青天含愁白日淡寒
氣凜冽彌蒼寥地鑪蒙茸煨榾柮熾火如山黯無色空堂
夜坐悄無人雲際冰輪照階側繭紙細密糊深房固守無
異金與湯不分寒威利投隙如錐脫穎旋穿囊黑羊之裘
白狐腋素挾奇溫與寒敵卻怪此日咸披靡複領重裾等

絺綌我知天道固有期
候當栗烈斯其時
況過長至入三
九元冥布令夫何疑
憶昨初冬菊未死
匝地暄和物欣喜
競說梅應早得春
星躔已踰元枵紀
峭寒陡作來幽都
刮人睂鬢侵肌膚
頓覺今時非往時
側身偃蹇生嗟吁
深夜重衾冷於鐵
殘燈挂壁時明滅
獨笑頭如刺蝟藏
夢魂難共春雲熱
豈無淺深椰子杯
傾壺一使愁顏開
香醪雖醇飲戶小
沙罌空致麻姑醉
豈無鸛鵒青花硯
濡筆狂歌追白戰
呵毫氣冷紛霜花
褻手遲回神轉倦
遙思窮巷簞瓢羣
無衣卒歲悲懸鶉
我欲具草奏顓頊
亟回旌節布陽春

乙卯

古劒行

有序

王子孝先越人慷慨有丈夫氣
昨歲攜古劒策蹇北上所

著詩卽以負劒遊名集今擬南歸解劒相贈作此謝之
匣中古劒何時傳光芒豔發凌星躔昨宵啟匣聲鏘然
鏤古篆名龍泉不將珠玉炫裝飾摩挲何遂無顏色
天然寶氣迴射人未逢烈士誰賞識君不見人中皎皎鐵錚錚
鍛鍊經久功始成君家佩此憐司直曾入工部短歌行不
交輕俠重聲價風雨幾聞吼深夜卻緣宇內無不平豈必
當前動悲咤爲余脫贈試吹毛笑問何如百鍊刀物無專
主有得失仍恐龍化隨波濤君不見豐城紫氣耀九州干
將莫耶今難求人生遇合亦如此可能持此斷離愁

送王孝先歸山陰

梅花香動雪初殘春早猶餘舊臘寒歸去卻逢修禊後
右軍遺蹟醉鄉寬

恰喜南行伴我翁

時孝先隨家大
人同往浙西

深情無限別離中富春

江上帆開日好看山桃萬樹紅

春暮散步城東渡河過香林院小憩田舍晚歸

撥醅新水滿塘均潋灩晴光浸柳梢三月海螯初上市一
春江燕未歸巢澄懷豈必常高臥遠眺無妨出近郊寂歷
紺園人不到隔牆閒聽梵鐘敲

未夏先思籊笛徒耕樵相對日忘晡異書儘可懸牛角長
劒休教佩鹿盧浦口炊煙雲際密渡頭漁艇暮還呼何時
得就山中宅自翦荒榛闢芋區

楊青驛馬上口占

閒雲變態野蒼茫路入煙村客思狂萬頃桃花千樹柳一
鞭收拾在詩囊

靜海道中

策蹇平沙道春風共往還一叢花似錦數曲柳如環村酒
家家熟柴扉日日閒余非行役者何事負溪山

漢氏成園丞印歌

延陵蔓草千秋荒土中掘得古印章印文屈曲摹印體大
小篆法殊雲陽奉園宮人理妝具上飯朝朝隨服御大官
送物誰典司園令食鹽專所務二十五祠廟祭繁四時祠
祭惟陵園駿奔趨走寅夙夜職卑亦得親賑膳尚方精鑄
龜爲鼻綰繫何人匹姓字翁仲爲守竝忘年玉雁金魚同
棄置當時飛燕啄皇孫淵默空言望若神一抔黃土歸耕
牧何如此印同貞珉摩挲翠色堪人愛金石錄中昔未載
重簾夜靜生古香肘後奚須如斗大

早秋過太液池

綠水澄於雨後雲長橋倒浸彩虹分不愁緩步驚鷗散永
日眠沙自一羣

瑣闥悵悵對水開似將明鏡寫樓臺瓊華一島休嫌小直
接西山翠色來

謁辟雍

聖哲扶天造成均重

帝京瞽宗標雅化領學聚羣英萬仞宮牆闢千秋俎豆呈
登山寰宇小觀海望洋驚地接辰居迴時逢當代清撝鏞
恢虞業釋奠肅冠纓魯宅猶存壁秦灰久滌坑三川迴地
軸一柱向天擎鳳彩流丹堊麟文動旆旌星輝匏似繫玉
振瑟還鏗轍跡無餘夢章縫在兩楹春秋垂特筆陳蔡失

專征庠別東西序鐘合大小鳴上尊期取爵祭菜念和羹
且得從公邁仍思稽古榮說經慙嶽嶽談史羨觥觥潔已
師童子無聞忝後生幸蒙五世澤敢負四時行偃僂威儀
重趨蹌步武輕典書纔鼓篋奉席比橋衡韓愈師堪式何
蕃業遂精大昕從始教末坐敢張聲

聖世漸摩治

皇猷夙夜宏講堂曾顧室闕里早除荆遣士由文黨觀光
自漢明然藜傳太乙習樂紀先庚車服崇瞻仰弦歌淑性
情於論歸首善思樂在昇平苦卓人堪鑄羣言液盡傾馨
香徵禮物鳧藻喜難名

棘闈中秋

秋色平分天宇空依然桂影廣寒宮青燈三載今宵月一

片吟心萬舍同

寄履方仲兄

十年窗下石爲田待辟湖州愧昔賢
籬外黃花人共瘦誰憐顚顚晚風前
數行書就憑雙鯉三百篇中感鵲鴿
未得鯤鵬成一變不如柳絮化浮萍

歲暮周月東招飲卜硯山房出觀所藏書畫

晴雲炙窗寒色淺翠幕無風春衍衍
主人愛客情意深籤軸繽紛遞相展
古錦葡萄芍藥紋名牋碧玉金花繭
活色生香盡陸離膠山絹海相夷演
水石羣稱董巨高花枝共道崔徐鮮
斑斑古色溢睂稜如際夏商見瑚璉
神品逸品總絕奇天工人工我何辨
是時繞室鑪煙清幾點疎梅茁

金華書生詩集卷一
枯蘚大白頻浮興轉豪指揮不覺金烏轉滿目琳琅秀可
餐絕勝天厨嘗禁臠別有珍奇什襲多鼎彝章印紛華變
矜高不易五城觀鄭重眞同萬錢選君不見道旁瓦礫積
轉深稂莠嘉禾各相眩知己無多識者稀奇材常受風塵
覬摩挲躑躅一悵然新月初來暮簾捲

丙辰

乾隆元年元日

鳳闕新頒正朔書龍飛大有一元初九天瑞靄升紅旭四
海黔黎仰紫虛
帝德漸看滋草木春風早喜襲襟裾從今擊壤歌應徧願
頌椒花萬歲餘

試燈日招吳焦音上舍家如岡姪飲味古廬卽席

分賦盆花得十三元

馬陸巧技長兒孫小白嫣紅徧瓦盆
賀歲杯前初弄影試燈風裏最銷魂
如雲繭紙朝猶護宿火甌鑪夜尚溫
回憶南西門外路豐臺都是養花村

諸葛銅弩歌

生不能回身挈腳隨材官手持白竹擒樓蘭
又不能運斤削木隨巧匠采榦恆山入幽嶂
窮年埋首事蠹書遠稽秦漢追唐虞
昨朝市中偶得銅器一似簡非簡觚非觚
歸來徧閱古器圖有物塊磊形相符
云是諸葛武侯所製元戎弩用以左射
右射從前驅青錢斑斑凝綠蕪圓軸宛轉如
門樞箭槽一道中間刻惜哉今時無人解此器
不然試之百步千步可廢雙鞬弧淮南有遺語
銅不可爲弩其言荒

金焦集卷之一
誕無足徵視此尤堪醒愚魯武侯固是天上人畱貽小物
皆稱神銅鼓至今讐蠻服木牛當日通秦軍弩隨八陣守
堅壁幾聞猛將迎鋒鏑渭水祁山杳無跡往事空吟籌筆
驛君不見白帝城南砂磧中亂石瑟瑟生陰風梁來法和
箭鏃空於後誰復知良弓

哭老僕周喜

周喜先祖遺僕也勤勞素著年八十餘死而無子詩以慟
之

吾家有老僕四世相追隨年已踰耄耄筋力難展施回首
念昔時殫心不知疲致身事遠塞目無少年兒辛苦汝備
嘗故舊我宥遺可憐衰朽質煢獨鮮扶持無何一室中奄
忽與世辭人生如草木朝夕有榮萎貴賤共一瞬惟忠足

昭垂因之爲揮淚詞以示來茲

登稽古寺藏經閣

峻嶒高閣出城西
百里晴雲接檻齊
擬把清吟驚碧落
不辭驕馬踏春泥
粥魚聲過收蓮梵
貝葉函深覆錦綈
莫信芳菲時節早
隔林無數露鶯啼

矮屋衡門繞四周
煙光低向足閒流
平田乍見新蕪合
遠水還看曉鏡浮
綽約最憐緣岸柳
清閒誰及臥沙鷗
日斜鈴語當風急
似喚遊人更少畱

新釀棗香露初熟獨酌賦此

小院花深月正團
詩懷欲共酒杯寬
試將東老新傳法
忘卻西鄰舊撲竿
豔奪春華濃似露
醉憐氣味靜於蘭
海塹應笑安期誤
長使如瓜歲歲乾

春暮坐繡野簾

野色春如繡，齋空燕坐宜。蘆芽初刺岸，荷葉欲抽池。避俗思栽竹，論材擬樹檜。朝來風力軟，牆外去帆遲。田野饒幽趣，分畦繞綠波。漁汀窺似鏡，蝌蚪聚成窩。架小青藤密，山平紫芥多。鄰翁談稼穡，攜杖日相過。閒階一雨後，習靜似僧房。初月蛾睂淡，新槐鼠耳長。汲泉烹活火，選句貯空囊。何必深巖隱，塵氛始盡忘。

和家漢客兄水西莊雅集原韻

水外園亭曲徑偏，深林初夏日如年。好花香散藤蘿架，修竹陰搖書畫船。薄酒數杯聊就席，野蔬一翦亦稱筵。最憐嫩捲田田葉，浮動池塘淺漲邊。

小聚茆堂作偶然，遊心溪口共山巔。催來夏景迎梅雨，消

去春光剩柳煙紫燕銜泥斜照裏新篁解籜晚風前詩添
清韻流絃外不讓西園雅集篇

年窠墨注歌

國朝陶器美無匹邇來年窠稱第一不讓汝定官哥均何
況永樂之坯宣德質卽此墨注如水壺下廣上弁豐而虛
置之几席斑管俱隳糜一斗可以擘窠書清光淡淡照硯
北云是雨過天青古時色神螭躩踞繞其柄鐵足周遭黝
如墨下有小篆曲景文觀者從此辨僞眞君不見右軍臨
池池水黑至今猶浸越山濕我欲從之挹殘汁

五松

偶讀崔融賦餘情徧五松但須天闕近不羨大夫封色蔭
寒廳古陰分翠壁濃著書忘歲月恐汝忽爲龍

沈貞女

有家未及母命之郎面不識數亦奇十三旣許徐家子妾
心誓與同生死自古鬱生義如此入門拜姑嫜姑嫜莫旁
皇由來妻道比臣道不學王珪魏徵千載令人誚

秋日過張氏一畝園感舊

滿目秋光落葉黃故家風物感蒼蒼繁絃急管飄零盡惟
有寒蟬噪夕陽

羅綺成叢轉盼空野花猶作舊時紅砌邊多少閒金翠寂
寞荒煙蔓草中

三千珠履盡能文坐上雄談蔚似雲朱亥侯嬴俱老去不
知誰憶信陵君

秋夜味古廬獨坐

商飈掠樹響騷騷漸覺寒威透敝袍滿院黃花蛩語急一窗明月雁聲高清名何必追龍腹妄念多如卷鷺濤聞說濁醪存妙理不妨左手更持螯

節烈四婦歌

有序

天津舊有三婦合葬焉一爲譚某妻陳氏一爲阮某妻諸氏以烈死一爲趙某妻裴氏以節死乾隆元年八月十八日金振妻丁氏無子視夫含殮畢旋殉柩側里人請諸當事與三節烈合葬稱節烈四婦云

君不見文文山作正氣歌津城節烈何其多父老向予說三婦往往涕泗爲滂沱二婦不受彊暴污秉貞浩氣還太和一婦食貧甘苦茶冰心鐵骨玉爲質不羨膏粱華腴珍羞羅凡此稜稜不可屈堪比蘇卿持節牧羊坡三豕纍纍

一抔土丈二碑碣字不磨碧天霜月何皎潔羞照人閒舍
羞妖冶嬌翠娥聞風興起金氏婦夫歿無子奈少何照見
古井水不波泉路匪遙矢靡他里巷聞之各酸鼻莫不心
欽足頓手摩挲嗚呼從來烈節天所鑒公道在人相護呵
今茲四婦合爲一各行其志同香窩
聖世采風重節義表厥宅里樹婆娑豈無鬚眉愧柔骨高
風松柏同巍峩

送家如岡姪歸海寧

迢遞歸心急冥鴻振羽翰卻憐詩酒契倍覺別離難回望
關河迴前程驛路寬臨岐何所囑珍重雪霜寒
送遠三千里囊餘書一擔望雲君自切聽雁我何堪夜月
光逾冷江楓影半酣棹歌歸去好山水舊時諳

追和心穀伯兄賞菊詩原韻

有序

丙辰榜後竟日杜門心穀兄飲余淡宜書屋酒闌夜靜談
及丙申秋賞菊唱和諸詩因出見示其中名士騷人雜以
瞿曇羽士亦盛事也回憶其時余尚在襁褓閱今二十年
矣紅友鬪題白駒過隙由今追昔感慨係之謹依前韻聊
自抒懷

東籬佳色傲霜秋共想幽人韻獨悠雅集宜增高士傳殘
牋未掃惜花愁廿年仍此重陽節三徑曾誰信宿畱收拾
青燈燒蠟炬今宵對酒不能酬

曉出廣寧門望大房諸山

櫟聲靜天衢蚤起逐鳴雁嚴霜滑馬蹄漸喜晴旭旦出城
矚遐景村塢宿煙散西山青於螺一一排遠岸疎鐘度佛

屋密樹翳仙館層巒殘雪明仄岫凍雲斷薜蘿如可攀應
有幽禽喚逍遙鞅轡停貯目愜馳玩

渡桑乾河

拱極城西水聲急千里一瀉竹箭直陡接銀河天上來中
途帶得泥沙色我來卻值寒冱時勁風謾謾吹征衣枯蘆
敗葦蕩已盡惟見點點寒鴉飛危橋亘空疑匹練立馬長
嘶不敢踐俯視頓教斗膽寒憑高更使雄心戰道逢偃僂
翁睂白顏如童告我渾河源歷歷辨始終翁言古昔大禹
隨山刊木日洪河支流多蕩潏灤河一股稱最雄橫貫西
北復南折桑乾山前草蕭瑟源可濫觴無泛溢歛然東下
勢若雲分作雙流遂難遏君馬來何緩行行歲將晚不見
夏秋初沖融百川滿健魚南徙不敢畱瘦蛟跋扈騰中流

噲吟鞺鞳鐘鼓集然犀或見怪沈浮或云河伯會海若水
族忽赴蓬萊洲長隄千金非不固止敵馮夷一宵怒偶然
蟻穴失防維四野驚濤沒村路

聖帝詔策卹下民議疎議濬皆重臣不然腴田美廬盡漂
蕩此身早與魚鼈鼉鼉爲居鄰吁嗟乎人生何異海中沫
牛涔非小海非大我家今住孝義鄉咫尺渾河作襟帶窮
源溯委自古屬吾儒乘槎直指牛斗途非迂何時桃花水
高春樹綠任我凌風長嘯驚天吳

房山道上

草枯沙見磧馬過雪畱痕殘照明山縣寒雲護小村玉塘
應有米石寶尚如門欲就樵人宿巖深景易昏

丁家窪

高崖四面圍深谷如仰釜流水漱石根蜿蜒到蔬圃砌埵
積層冰清光耀鷺羽飲馬忽忽驚踏空仍在土飢鳥棲一
枝羨彼老樹古園林寒翠疎鱗次出檐宇闌寂塵慮空覓
句吟逾苦飄風動征衣孤村響砧杵

羊頭岡尋高尚書墓

寒岡淡無姿孑立森瘦骨徘徊亂石閒疲馬鞍暫歇側聞
高尚書葬此山水窟流傳墨竹派遠繼湖州歿二米染雲
煙師承盡毫髮遺蹤四百年來者失津筏我循墓道行松
鬣猶蓬勃豐碑侵綠苔幸未近耕垡虎嘯動深谿悲風自
此發暝色何蒼茫吟心轉恍惚但讀西巖詩珠林照寒月
欲遊上方白帶諸山不果

久聞上方山矗立霄漢裏復聞東西峪僧有數千指圖經

曾臥遊未得造巖趾白雲空去來遊息羨鹿豕今晨山下
行積雪襯紅紫亂峯插芙蓉峭嶒眩高視塵蹤負夙願相
望隔墟里慚愧杜陵翁青鞋何日始

東安道上

一路寒風送馬蹄晚鐘斜日縣城西蒼茫僻路行人少敗
葉蕭蕭鳥亂啼

爲汪西顥徵君題花塢卜居圖冊子

臨安富川巖諸峯在肘腋湖上厭劇游西溪獨幽僻吾友
愛地偏結茆枕槃石誰家舊花塢于焉卜新宅春初百卉
競嘯詠忘役役泉汲清澗寒籬穿短筍碧我亦素心人每
蹈尋芳跡他日橫山堂與君接茵席

臘八日偕汪西顥徵君家天來姪飲水西莊之花

影菴分賦得十蒸

未肯潛藏類凍蠅，卻無奔競有誰憎。
笑非天下功名士，差似人閒粥飯僧。
鑪火旋消茶竈冷，月華初吐硯池冰。
何須鐘鼓追鄰寺，長此偷閒我最能。

望海寺

殿角瞳矐寒日明，憑高迢遞見蓬瀛。
河分九派門前合，潮送三山檻外迎。
煙靄有時浮刹影，霜天無際徹鐘聲。
回瞻宸翰光華著，長使波濤晝夜平。

冬日偕高五雲汪西顥家天來重遊香林院分賦
得十三元

廊外別開門，鴻都舊跡存。
殘牋猶挂壁，危石自生根。
鶴唳風聲勁，烏啼樹影昏。
晚來隄上望，寒月淨無痕。

月夜自水西莊步至空亭舊址望西淀水閒積雪
夏日恆苦熱冬日恆苦寒褰帷不畏寒入骨當頭爲愛月
影團疎林蕭蕭閒蓬戶鄰火參差出牆堵夜春斷續人未
眠婦子時聞喧笑語行見空亭舊址荒草枯霜白似鹿場
侯門興廢古無常區區何足生悲傷隔河忽近無垢國琉
璃爲地添粉飾零星殘雪搖春光極目疑在廣寒側憶昨
秋霖漲溢時銀濤欲捲扶桑枝出浦漁舟驚海若鷗鷺竝
徙滄江涯疊浪堅冰轉眼異可知通塞尋常事自來耐冷
惟纖阿夜夜還擁冰輪至

祀竈

粵自燧人興取土中央燥旣以孟夏饗胡爲季冬醕殘臘
逼歲除禍福詎神造耰耨箕帚語直向昊天告雲車風馬

行糖豆粉餌勞黃羊剖以酬白雞殺以報邀飲及比鄰五味雜傾空同門井司酒漿播文誥俞子記可師魯望解最妙

銅鼓書堂遺稿卷一終

男淳孫樞校刊

銅鼓書堂遺藁卷二

宛平 查禮 恂叔

丁巳

正月六日高五雲孝廉汪西顥徵君胡文錫秀才
家天來姪集味古廬對雪分賦得花字

曉看庭霰映窗紗
豔雪爭春潤物華
舊約仍穿三徑入
早梅初放一枝斜
詩人不在功名列
風味依然處士家
來日無妨同翦勝
諸君誰更筆生花

人日水西莊小集

山蔬野蕨作春筵
來趁西園雪後天
吹到條風便駘蕩
枕溪廊外漾輕煙

送符幼魯主事歸錢塘

東風吹柳碧毵毵惜別樽前意那堪儘可吟情同硯北如
何帆影指江南梨花夜落三更雨桃塢春生百尺潭想到
西湖攜屐好亂峯深處筍抽簪

三月十七日汪西顥攜酒招同汪惇士胡文錫過
水西莊予不果往簡詩一絕

芳草如雲倦蝶魂春風幾度拂清樽愁腸百結花無語開
徧丁香未出門

送家天來姪歸仁和

雪後金湖水似雲羨君歸路惜離羣柳條送客情難盡桃
頰迎人色正醺酒罄餘歡翻寂寞詩添別思倍殷勤縈紆
碧草三千里兩岸鶯聲忍獨聞

謝趙功千徵君惠龍井茶

薰風南至白晝長驟炎天氣梅子黃小齋幽處鳥聲寂午
倦敲脚傲羲皇北窗一枕夢初覺煩渴思吸紅甕漿恰好
封題來日下麥顆寄我翠筠筐開簾頓喜清香發藍英簇
簇含芬芳產自龍井信靈卉摘焙工細超尋常武林山川
割秀氣龍泓泉石標旗槍茶人飽食紫花脯茶鼎詎愁臯
盧荒我急爲滌甌犧具呼童汲泉手足忙松聲蟬眼文武
火法案經訣意周詳啜之一椀至七椀翛然兩腋生清涼
清溪潁石何足數品第顧渚差堪方漫說輕身與換骨還
憐破悶兼搜腸令人少眠始見真茗分五等此最彊感君
知予嗜茶癖不待致書貽頭綱何以報之夜旁皇吟興笑
減醉歌狂浣花牋帶珠蕾色遙將滋味共君嘗擬垂清塵
傲天壤薜以當酒今何妨

金華集卷之二
雨後同劉紫仙余元平汪西顥余犀若過水西莊
看荷分賦得暑字

溫風被長林結伴度芳渚西莊最清涼爽氣薄島嶼熒熒
芙蕖花出水燦如炬雨過無纖埃開軒滌煩暑猗彼婉孌
姿含芬動少女聊將醪醕酬何用桂棹舉浴鳥泛白鷗遊
魚戲魴鱖田田翠蓋閒鱗羽竝得所爲歡當及辰觴詠抒
情緒解衣笑嵇阮褌巾誚傖楚攜屐思東山圍棋賭別墅
興盡尚徘徊因花索解語

送侍讀徐魯南先生還宿遷

江東數耆舊落落晨星殘先生秉儒行舉世尊儒冠昔者
趨禁籞偉望標朝端簪筆比班馬摛文繼歐韓三千長牘
奏九萬高風搏龍池柳正綠螭陞霞初丹中年偶息駕衡

必資盤桓三餘事搜討四庫儲綈紈晴軒據梧讀牋襞盈
牀攤繩繩榕村學振委揚其瀾鶴書自

天至碩學徵甘盤前遊續玉府新渥陪金鑾固知松柏
質益被雨露溥朝來念初服結想歸河干安車上苑出祖
帳東門觀豈曰豹隱霧實乃鴻漸磐西沽水清澈入海波
漫漫蒼葭聚淺渚碧柳圍清湍維舟得信宿雅好通金蘭
捧袂方告始離軫何遽彈嗟予志披謁夙昔銘肺腑吉光
一羽覩寶過青琅玕惜哉良會促未罄平生歡鍾吾雲繞
驛白洋浪捲灘興懷渺千里川塗鬱相蟠安得如澠酒時
時祝加餐

秋夜對月懷家天來姪在秦中

宵深涼露滴天末雁書稀詞客應添賦征人欲授衣蛩聲

當戶靜螢火入林微遠夢無拘束時隨落葉飛
懷人不可見況值萬山秋回憶同樽酒何堪獨
夜愁名都三輔舊逝水八川流未識因依處憑誰記壯遊

水西莊秋日雨中八首

西莊闢自信安灣竹筧茆檐屋數間習靜不驚風雨驟蓼汀深處釣翁閒

雨趁涼颼透戶櫺重簾不捲晝冥冥焚香掃地無多事二百籤餘小品經

村居幽趣許誰同不是詩人卽畫工一抹林巒描未得亂雲如絮白濛濛

碧水迢迢漾淺沙幾叢修竹野人家最憐秋滿疎籬外帶雨斜開扁豆花

拂隄衰柳濕拖煙漲溢長河浪拍天獨坐數帆臺上望羣
鷗飛過打魚船

幽人鼓吹聽蛙鳴紅板橋頭蟹市清何處疎鐘敲遠寺漫
催暝色寫溪聲

覓句何妨上小樓野籜歷歷雨初收夜愁夢入園西路一
港瀟瀟蘆荻秋

舟載寒煙乍有無披簑貫笠渺江湖輞川妙筆須誰借摩
詰如生必我俱

贈杭大宗編修

龍輔藏堅珉精英達山表駟生渥注天閑待騰裏自古
宏雅儒奇光不終葆苟非明堂珍卽爲清廟寶君才萬夫
敵充實無虛矯美質含瑚璉清文飾黼藻蚤年事迹作肆

力志軒曄機杼由性靈規撫惡竊剽汲古功尤深篋篋任
傾倒豎義長城堅披源大河浩優游三十載藝圃秉麾纛
忽應褒書求觚棱日初曉遠辭薜蘿徑時視明光草螭均
長拜趨柱下恣蒐討三禮昔紛綸聚訟煩勘校君憑學識
超析微虛必擣明辨忌雷同純粹體直道鄭王與孔賈箋
詁窮杳渺壓角詣省初奪席衆儒小憶昨訪君廬輾轉走
行潦旋念水中央幽懷獨縈繞蘭蕙本同根芬芳無異抱
先路覬相攜周行殊了了倘肯分秋鐙來緡石經考君近著石
經考異一書
開離日下

贈趙功千徵君

逸經古記辨無譌驟遣星軺出澗阿人擬趨朝旋釋褐自
甘補屋尚牽蘿青山乍老遊情減黃菊重開鄉思多籬下

不妨尋舊約與君一醉一高歌

丁字沽阻風寄周七峯

輕橈出煙浦開樽擘蟹臍
鴈郎喜無事瀏亮謳聲齊
盲颿忽西至號怒驅鳧鷖
陰霾疊水面駭浪激危隄
中誰鬪罔象余欲明然犀
潭深一篙短影側半帆低
梢潰與撇漩怪語於誰稽
嗟此尺水險何異複嶂迷
泊岸日已夕聊復事攀躋
念我同心友咫尺通行蹊
柴門遠剝啄蘭蕙盈秋畦
引領不相見擘紙寄幽棲

舟至津門口占

秋高風冷雁聲疎
黃菊開時木落初
燕市歸來無別物
碎琴價易滿船書

煙草聯句

煙草古所無事由後聖作托體冒稻粱山陰劉文起岱占

圻壻稔纔三百逾錢唐汪根已九州著萼濡露豈秀水

泰循葉隕霜不落驕驕出畦塍宛平查鱗鱗臥林薄余塘

千箱載仙紫浦城交樞縛細疑金縷顯西片訝木枿削油兼

麻菽黏初循采雜丹黃錯精舂選質殊叔恂生熟儲材各製器

比佩觿仙紫懷鉛儼垂橐湘筠直榦標顯西越冶良金躍初看

呼吸通初循旋覺混沌鑿升煙陶安駭叔恂吐火偃師作霏霏

雲盪胸仙紫霧霧噴齟齬騰驚然頭顯西霏開倏刮膜銜枚

詎有征初循齧箭幾無鏐焚心任鬱攸叔恂炙手方焦爍磨兜

口緘似仙紫懿戒舌捫莫俗士學含毫顯西羣兒戲秉籥熱中

異皇皇初循苦口肖諤諤既勝咀檳榔叔恂寧須席糟粕名窮

郭璞注仙紫物窘張華博雷公乏炮方顯西炎帝空鞭藥昔未

登本草

初循

近乃延沙漠或幟樹交衢叔恂或價騰遼郭或少

長爭趨

仙紫

或主賓酬酢入門先茗薜顯西終筵後羹臠競誇

易牙調

初循

竝受丁娘索即次旅可巢叔恂覓句思可絡熇蒸

暑可迨

仙紫

噤瘁寒可卻猶稱飽食賢顯西那慮獨處廊誠哉

習俗移

初循

殊嗜失渾噩我思神農來叔恂九穀濟民瘼疆因

稼穡啟

仙紫

土為耕耘拓苗於莠必鋤顯西葉惟桑可斫降種

悉由天

初循

此詎勝藜藿利等鹽鐵饒叔恂害如蝥賊惡腴壤

棄黍稌

仙紫

田峻乖刈穫顯西必自游民顯西饑難振溝壑作詩

肖虞箴

初循

敢云資盟噓初循

丁巳閏重九招劉紫仙王孝先吳中林朱崙仲李

仁山周月東余犀若胡佩康趙端人汪西顥施濟

清萬循初心穀伯兄集秋白齋賞菊

少暉司秋辰伊耆定閏月積分既有常歲功乃無闕古人

置閏當歲終義同履端於始居門中周人建子秦建亥後

九月稱自祖龍顓頊歷以十月爲歲首凡閏月皆在九月後秦因之稱閏月爲後九月行夏

之時卯金起古歷重頒太初始閏九之月推三年偶一相

逢常踰紀今年秋季去復來涼飈瀟灑黃金臺無射聲高

金德盛登高頻鼓安仁興昨宵月上弦中氣秋冬偏開我

秋白齋繞屋羅嬋娟十分秋色勝春色幾家愛菊勝愛蓮

蓮逢閏六月一落不再妍菊逢閏九月顏色尤新鮮麗采

繽紛香絡繹對此儘可娛朝夕君不見宛轉旣緣階踟躕

復照席或肖蒸栗黃或擬丹砂赤或雜翠羽青或攢鶴翎

白或漬燕支紫或映湘竹碧或內植如主或外環若客或

丰茸若毳或纖細若畫或踞高若傲或俛避若迫或猗靡

若隨或夾輔若掖奇情異態千種萬類夭矯不可狀恍如

入七寶之欄錦絲之障仙影迷離霓裳飄颺試問陶氏東

籬陸家甫里幾見天工人巧一一別自靈根花中有洋菊數百本

自昔黃花最耐久今秋更益黃花壽萱草參差映北堂卻

教重獻南山酒家生母設悅在重陽節今秋花甲始周拾逢閏月酒自餘杭勝蘭

陵花來酈縣含芳馨每逢一閏一甲子菊花卽是弧南星

沉復名賢不常遇幽齋合慶朋簪聚舊友曾停戶外車新

知又滿筵前履燕歌吳詠盡雄文少長咸推大雅羣吟懷

直欲凌千古勁敵於茲張一軍清談旣足聆何必絲與竹

寒英旣可餐何必金與玉氣靡沈謝輕曹劉咳唾莫不成

琳球文字之交拔其九雅逢知己抵封侯萍葉無定蹤蓬

根無定所山川自古今天地原逆旅此日銜杯花月前他

時花月又誰憐雪泥鴻爪空陳跡渭樹江雲盡渺然君不見天花風鐸延清賦剎鳳蟠龍巨山句當年佳節愛閨九各鏤文心托雅素唐宋之間李嶠有和中宗閨九事已千秋斜陽古寺夢悠悠誰復黃花慰遲暮惟餘文采垂風流敢云俊秀抗同儔獨慚康樂夫何憂

送朱稼翁上舍歸秀水

九月清霜肅千林秋氣高歸帆隨雁序解佩惜江臯有分攀征袂無緣罄濁醪臨流一悵望離思颯蕭騷

黃花店書懷

有序

余今歲植菊千百本於秋白齋適逢閏九與同人倡酬花下興倍淋漓至樂也忽有榆堡之行次桃花口之西北有村名黃花店土風醇樸景物蕭疎村之中有一古閣飛棟

層檐足供遠眺雖店實無花而村名頗雅且不無佳境可
憑卽從閣主人索得殘紙敗筆率爾成章聊以寄余懷菊
之意云爾

秋花本閒淡意與靜者宜晨夕愜素心不知秋去時無端
花主人秋去人亦離一從別花後驅車薄層颺丹楓醉嚴
霜白榆搖枯枝所遇非故物短景看西馳行行見墟落炊
煙動茆茨居人胥淡泊古樸鮮容儀駐問桃花口徒滋搖
落悲乃聞山店名停車一訪之惜哉黃花店孤負舊霜籬
如何老耕垡而忘五柳師懷芳感宿念玩景興遐思飛閣
攀巍峩極目天無涯回首憶津門日暮孤雲垂臨風想我
友宛在水之湄人生無羽翼飛蓬悵空隨竊恐秋時花還
同百草萎

秋暮野望同王孝先

結想渺無端尋詩隨所至策蹇趁秋杪踏徧白沙地夕陽落遠山清磬出幽寺寒雲壓長林喬木託深契自覺俯仰寬誰知遊者意

榆堡雜詩四首

有序

榆堡在畿南八十里祖墓在焉有宅一區凡春秋展謁必棲止數日今年履方仲兄以眞州通守叨膺

綸命因及秋祀焚黃於墓謹賦四絕以紀其事

龍章新捧自天來競整衣冠拜草萊一命叨榮皆祖德承先敢說子孫才

馬鬣封前秋祀虔山肴土蔌亦成筵村娃野叟誇珍饈蓬鬢繩腰繞墓田

秋來潦水沒平田
陸地從教舟濟川
填得黎陽新樣土
有隨鶩鴨鬧牛眠

百果凌秋結磊砢
就中酸棗北方多
南朝樂府誰須繼
試聽纂纂花下歌

寄懷香雨廬諸同好

吾家孝義鄉民風
素沕穆考宗自高曾
百年聚國族一從徙
漂榆塵坱苦馳逐
茲晨旋柴車日轡轉
北陸墓田肅祀事
既享騁遐矚霜明隔
岸葉煙暗前村屋
清襟得披豁離思忽
相觸念我同心侶
鍵關對殘菊笑言十
日違停雲悵極目蕭
蕭北風涼能不悲落
木

有懷堂冬夜聯句

深夜荒村集

查爲仁心穀

相看豈偶然
津河勞跋涉

李授仁山社保

足流連瞻拜沙城近王孝先追隨棣萼聯

王綸宣鳳翥查禮叔丙舍協牛眠為趁澆松日穀心同吟擊鉢

篇鑪圍通軟語山仁趺坐學安禪吠犬巡深巷先孝飛鴻下遠

川月迷殘雪徑叔恂人戀小春天心影空愁畔穀心燈花落酒

邊更長人易倦山仁境靜地尤偏垂幕浮銀杓先孝分曹擘錦

箋寒英餐紫菊叔恂香稻煮紅蓮飮座金橙嫩穀心登槃玉膾

鮮言如蘭馥郁山仁夢逐蝶聯翩白首期來日先孝黃梁悟早

年功名煩竹帛叔恂聚散感風煙喬木春秋古穀心光華甲子

遷良辰須鄭重山仁素侶愜周旋漸覺雞催曙先孝渾忘霜折

綿何時謝塵網叔恂於此跨烏犍穀心

同李仁山王孝先兄心穀野香居沽飲次仁山韻

捲席成檐屋似巢高懸青旂出林梢杖頭錢坼新泥甕瓢

裏詩憎舊繫匏漁弟樵兄皆酒伴溪毛山蕝盡珍肴野香
須待梅花放醉覺荒村便樂郊

榆堡夜坐同心穀兄作

寒光如水撲檐楹無際霜霄一雁鳴窗靜正宜延月色林
疎不復礙鐘聲荒村兼味雞同黍深夜聯吟弟與兄最愛
閒居城市遠夢回免得數嚴更

南莊道中

落日寒無色晴煙暮轉蒼野田惟剩雪木葉有餘黃馬逸
嘶風健鴉昏掠水忙征人歸思迫迢遞過南莊

夜宿聞思寺

暝色上林端征途息塵馭歸禽聲嘈嘈磬響梵音度言尋
田墅宿翻與紺園遇庭空淨五蘊殿古依雙樹徐看佛火

明篆煙裊香炷疎風透禪關冷然得佳趣夙昔愛清淨棲
心在貞素結宇青蓮池於茲證妙悟

雪後遲心穀伯兄不至同人以畱伴疎梅小雪天
爲韻分賦得伴字

旭日抱扶桑寒光耀震旦深林宿靄微遠浦浮煙散玉積
山已頽瓊飄戶猶燦音聞屐齒頻可無索居歎離懷逼鳳
城相思渺河漢昨夜雪深時孤燈更誰伴朝來數引領征
鴻連復斷遙知輾轉途旁午冰初渙踟躕馬足煩輾轉車
聲漫羣賢集已久鑪冷索獸炭行人不果來詩酒分杯案
吟罷尚徘徊獨向門前看殷殷兄弟情豈特在毫翰

城南水泛歌

陸行利用車水行利用舟各適其用利其利帆檣牛馬不

相謀朔風一夜關南至河水吹高等平地處處牽船岸上
居家家盡法張融智漂榆城南寒月明石田萬頃何晶瑩
浮光倒射天影白七十二沽無水聲舟師漁師竝穎悟伐
木丁丁作牀渡非舩非舩淺不浮以冰爲陸輕舁步歷坦
旣絕風波慮乘堅且似推殷輅獨行可學敲脚眠竝坐何
妨交臂遇綠蟻時已窮招我同心儔緩步出城關共作南
郊遊冰牀鹿鹿艤湖側凌風臥看玻璃色疾發羣驚鐵箭
飛往來更似金梭織須臾忽近招提境樓閣岩巒妙思騁
怪我初從鮫室來滿身猶帶珠光冷觥籌雜遝催談笑聲
喧豗不知銀漢淺惟見玉山頽八蜡祠前擊社鼓聳身直
入清虛府翻喜今年臘日長不須早喚春風舞暮訝輕雷
鳴澗壑霜星搖動銀花落侍晨執蓋影參差仙佐馮夷奏

金華集卷之二十一
嘉樂無辭秉燭極歡娛醉卻寒威抵萬夫歸時更踏堅冰
去記取城南舊酒壚

香雨庖獨坐

幽情遠物情不與利名爭籤軸詩書亂甌犧風日晴身將
梅共瘦思與雪俱清茶罷耽吟久鑪煙一縷生

戊午

正月四日吳中林司馬李仁山上舍汪西顥徵君
萬循初孝廉集香雨庖飲梅花下分韻得斜字

谷風來習習迎春扇物華小庖過微雨幽香動寒葩日高
弄疎影潑墨上窗紗淨如點白雪紅或碎丹霞羨此勁秀
質眞成玉樹花羣賢重淡交不爭凡豔奢花旣無纖塵人
亦無纖瑕翻嫌詩酒伴遠傲山人家孤峯削鳥喙怪石壓

蝦蟆點綴本天然尚欠竹陰遮欲窺清淺意待徙水之涯
佇看春燈逼新月已西斜

上元同吳中林汪西顥萬循初過水西莊登數帆
臺觀雪分韻得雪字

春城夜夜笙歌徹萬戶春燈燭天熱佇看銀海展金輪共
道傳柑好時節五更忽訝布同雲狂肆獐廳尤惡劣水花
散亂壓樓臺旋報街衢沒行轍曉騎款段出城西四蹄往
往愁跛蹙衝寒直過水西莊數帆臺上景奇絕連村樹樹
著梅花棲鳥不飛啄瓊屑同人縮頸呼酒急笑指青帘凍
如鐵撥甕新醅色頗清春初早韭香尤潔嗜慾心從無垢
折須臾觴詠胸襟別就中惟我意最拙思將紅日烘巖穴
僵毫安得遽生花呵硯頻磨烏玉玦吟到迴風句始驚褻

底乍恐春光泄欲待秉燭興已極排空雁字聲幽咽歸去
圍鑪任醉醒劇談休管燈明滅晴時更約數帆來蠟屐何
妨踏殘雪

寄懷鮑千仞

風和徑生草溪綠水無波春城隔煙霧相思悵如何憶昨
衝寒來皓髮顏微酡相期采藥去歸趁明月多此意非不
佳青山近可過從君棄筆硯腰鐙入巖阿

花朝前五日招吳中林李仁山汪西顥萬循初過
水西莊小酌各賦五絕

梅子纔生柳散條辛夷未放草如袍濃煙細雨無多日又
見東風破小桃

也將數畝種桑麻結得茆菴近水涯不學河南張貢舉手

持貝葉念曇花

閒情覺比宦情濃局外參觀勝局中鴉背夕陽畱不住祇餘一抹斷霞紅

筍鞋踏破鷺汀煙夾岸桃花繫釣船若得春光終不老何妨於此共忘年
幽情如夢預難期來日空勞去日思惟有吟詩兼酌酒花朝月夕盡良時

題汪西顥對牀風雨讀書圖

潑墨漲溪煙秋氣寒林木風雨掩柴關何須客看竹叢書塞座隅芸籤散芬馥遠擬鄴侯家插架三萬軸兄弟自相師討論縣信宿不爭徐孺謁競效陸倕讀連枝忽偏隕逝者不可復披圖感棣華回首羲輪蹙長枕事已非池塘夢

誰續慨此三重茆彷彿東西屋

上巳同劉紫仙吳中林趙端人汪西顥萬循初胡文錫登稽古寺藏經閣晚過水西莊飲攬翠軒

清風徐來遲日妍絳桃初發花欲然城西草色綠如翦迷離遮斷陌與阡一抹青煙繡平野超塵域近同駐馬雜樹蒙茸積翠陰慈雲朵朵垂檐下傑閣巍巍碧漢高俛窺萬戶明秋毫鈴聲滿耳衆籟寂市近未覺人喧嘈梵宇重重耀白日莊嚴百寶魚鱗密世界憑誰悟大千吾徒數備竹林七粵稽白馬止鴻臚寺名從此屬浮屠度人何止鹿羊車圓通自有智慧珠水西另闢清幽境賓從往往轄投井酒中仙惡醉逃禪長齋之客緣未請當筵又見日西斜分杯插羽飛流霞興酣各趁婆娑舞聽我長歌且無譁君不

見河水金人爭掌故蘭亭遺蹟空山路往事多聞虞哲爭
盛名只有孫王序何如痛飲青絲瓶高談兀傲傾平生燭
花如豆當花照未許城門報一更

惲哲長縣丞畱飲平臺

斜陽明曲牖把袂忽登臺塵市參差出林巒次第開孤雲
隨去鳥朗月照餘杯更喜簫聲徹眞疑天半迴

如意船歌

生不願入海求神仙海風引船船欲顛亦不願從軍事楊
僕萬斛樓船渺如粟吾愛此舟樸且輕一葦靜泛滄波平
短帆十幅隨舒卷風止亦止行亦行木蘭橈沙棠槳牙爲
檣錦列榜不及吾家書畫舫日夕乘潮穩如掌蘋花疎疎
蘆葉長獨把魚竿任來往

薄暮舟泊潞河州城下偕循初買小艇尋天橋灣
不得乘月而歸

聞說天橋景最幽荷花深處正初秋興來買得瓜皮艇前
指迷津狎海鷗

欲尋銷夏別無灣登岸微窺露遠山滿地月華流似水石
塘高枕聽潺湲

謝王廣心侍御惠湘蓮

攜從驄馬使出自楚江濱百室盤旋處中心甘苦均湘靈
香淚染漢女珮珠勻清絕官齋意多君氣味親

百草溝上望田盤山

積雨秋深滿車轍行行迴與鳳城別山靈不許畱纖塵示
我青山淨如刷周遭馬首相迴環秀色峻嶒儼可擷疊嶂

層巒在襟袂夕照移情傍巘嶂掀睂細望十五峯僂指數
之一無闕星羅碁布分高卑蠖屈龍伸互凹凸端如正士
垂冠紳靜如飛仙歷冰雪遠如衆鳥翔蒼霄繇如甘瓜衍
繁飈朗朗忽聽巨鐘鳴百里青煙共蟠結一時七十二禪
關暗制毒龍妄念絕道逢野叟問遺風此地誰稱古時傑
羣言隱士古頗多惟漢田疇名不滅漢庭鼎沸失關河青
冀幽燕交僭竊田公一生忠義士高隱無終懷激烈報讎
不受魯連功奉使無羞蘇武節嗟哉斯人已不作千古徒
令肝膽熱苟非浩氣鍾此山那得高風冠英烈我來擬卜
山下居短短新茆候時截開軒蒼翠撲檐楹嘉樹蒙茸足
怡悅青鞋布襪事非難長向茲山養疎拙

松雲硯歌

問松何從生生自蒼崖怪石閒爲君作梁棟廣廈相周環
問雲何從起起自層巖窮岫裏爲君作甘霖沛澤彌遠邇
嗟爾硯石惟一卷硤硤有聲質頗堅窗明几淨取適用何
事下松上雲煩雕鑄閒來拂拭思其義輾轉摩挲愈青翠
想如几杖銘微言卽松卽雲寓深意君不見世人作文趨
紛華濡毫學染三春花惟松後凋守嚴正足以壽世無夭
邪世人作字競方幅左右拘牽同桎梏惟雲無心任去留
可諭優游資化育又不見石本孤雲根噓呌成青雲雲散
有時盡石老千春存若彼松風石佳名垂在昔時供染松
煙遠勝藍田璧我今得此二妙俱無用岱岳尋枯株恍見
封中態卷舒咫尺掩映春模糊臨池洗妙墨影活龍蛇黑
共驚草聖奇傳觀不得息操觚各各紆長歌松聲雲氣成

煙波犀紋鵝眼今已少松兮雲兮奈爾何

題硯北勘書圖爲家七倫兄

桐樹陰陰垂翠幄日光斜轉珠闌角臨流獨坐手攤書玉
軸牙籤燦斑駁露華滴硯清如珠支頤不語頻操觚有時
撫卷行起舞搔首欲向前賢呼兄家南海濱咫尺三山樹
弟家北海傍迢迢九河路相逢京洛羣稱奇蔚然如對青
瑤枝同流異派源豈遠依依棣萼長追隨懷才自合乘時
起何堪久住深山裏石渠天祿祕書多甲乙丹黃從此始
勝後余荆帆以詩見慰依韻和荅

傲霜惟有菊精神一度看花一曲新月裏仍畱青桂樹堂
前未慰白頭人頻年卻喜詩添友壯日空期祿養親子道
須兼臣道盡患貧庶到貴能貧

寄杭大宗

枯水人如舊東籬菊自深榮枯俱是夢得失不關心風急
秋光老霜寒夜氣沈細思憑遠雁吟就寄遙岑

哭王廣心侍御

璞抱連城值出自荆山巔舉世誰不寶質古色愈鮮嗟余
相見晚握手心拳拳真純非貌敬言動無尤愆允堪消鄙
吝朗然竝前賢無端忽隕逝幽陰閉重泉有識盡同悲良
非故周旋臨風頻灑淚雲山悵延綿

方鏡十韻

誰折瓊臺片周遭一尺天高眠妝閣畔卓立綺樓前負處
眞如局磨來尚似甌重帷遮不盡圭竇映無偏忽訝晶簾
落翻殊碧月懸清輝剛滿匣直道擬張絃弗學摸棱相應

羞宛轉緣奇光畱匹練妙算得方田紙帳疑形似銀屏蓄
影連街頭如聽卜四角望車旋

送吳中林卽次畱別韻

何必重增求友聲兩年伐木聽鳴鶯每傾腹笥徵源委如
飲醇醪見性情燈火三冬寒透骨朔風一夜雪盈城征途
覓句無人和自整吟鞭按轡行

以吳綾贈杭大宗有詩見寄次韻奉荅

海津風土異江左原田每每無桑麻道傍豈少棗與栗橫
枝直榦空槎柯輪囷百貨仰南國築城適際河三义帆檣
成林客騁驚日暮還聽吳音譁卻笑北人異嗜好如屏膾
炙探瘡痂輕羅細縠非素蓄搜求往往同披沙昨趁和風
動阡陌南轅喜返故人車攜贈無多止數匹清絲密理質

頗嘉不比織成錦褥段中有鯨尾掉浪花我未卷還爲君
割劇慚樸素非繁華兩心和平詎厚貺報我反愧瓊瑤加
爲言一百九十六再三熟讀忘其他一縑一字古所貴遺
者何儉酬者奢同聲聊復申綖繾敢云鬪險競相誇

歲暮張少儀徵君過味古廬飲梅花下用岑嘉州
喜華陰王少府使到南池宴集韻

爲待江南客因移薊北梅疎枝侵臘破佳士挾春來細翦
朦朧燭頻傾潋灩杯東皇開獻歲還約醉千回